

## Saoirse do lucht siúlóide

### Ceist 1

Beidh tú ag féachaint ar ball ar thuirisc faoi shocrú idir feirmeoirí agus an rialtas chun níos mó saoirse a thabhairt do dhaoine a bhíonn ag siúl faoin tuath. Sula bhféachann tú ar an tuairisc pléigh na ceisteanna seo leis an duine in aice leat nó le do ghrúpa:

Cén fáth nach maith le roinnt feirmeoirí é nuair a shiúlann daoine ar a gcuid talún? Cad iad na rudaí a chuireann isteach orthu? (Smaoinigh ar gheataí, bruscar, ainmhithe, srl.)

### Ceist 2

Anois féach ar an tuairisc cúpla uair agus déan iarracht an leagan Gaeilge de na focail seo thíos a aimsiú inti. Ansin cuir do chuid freagraí i gcomparáid le cinn an duine in aice leat.

An bhfuil mórán díobh ar eolas agat sula bhféachann tú ar an tuairisc?

1. landowners \_\_\_\_\_
2. walkers \_\_\_\_\_
3. compromise \_\_\_\_\_
4. tourist season \_\_\_\_\_
5. about to make an arrangement \_\_\_\_\_
6. annual payment \_\_\_\_\_
7. walking routes \_\_\_\_\_
8. to maintain them \_\_\_\_\_
9. a few sheep \_\_\_\_\_
10. some cattle \_\_\_\_\_
11. holiday packages \_\_\_\_\_
12. the latest figures \_\_\_\_\_

### Ceist 3

Anois féach ar an tuairisc arís agus déan iarracht freagraí na gceisteanna seo a aimsiú. Ansin pléigh na freagraí leis an duine in aice leat.

1. Cé mhéad turasóirí a tháinig go hÉirinn i 2004 chun siúlóidí a dhéanamh agus cé mhéad airgid a chaith siad?
2. Cén sórt socraithe atá Cumann na bhFeirmeoirí ag déanamh leis an rialtas?
3. Cén dearcadh atá ag an bhfeirmeoir Dónall Ó Loingsigh i leith lucht siúlóide?
4. Cén sórt gnó atá ar bun ag *Go Ireland*? Cad a deir siad faoin scéim nua do bhealaí siúlóide?
5. Cad a thaispeánann na figiúirí a d'fhoilsigh an eagraíocht turasóireachta *Fáilte Ireland* inniu?
6. Cad leis a bhfuil lucht an tionscail turasóireachta i ndeisceart na tíre ag súil?

**Ceist 4**

‘Deir siad *go ndéanfaidh* an scéim bealaí siúlóide an-difríocht d’ainm na tíre seo thar lear.’

‘Tá lucht an tionscail ag súil *go gcabhróidh* an scéim nua bealaí siúlóide chun níos mó turasóirí a mhealladh go dtí an tír seo.’

Cén ghné den ghramadach atá i gceist leis na focail i gcló iodálach thuas? Pléigh iad leis an duine in aice leat. Mura bhfuil sibh cinnte cabhróidh an teagascóir libh.

Anois críochnaigí na habairtí a leanas ag baint úsáide as na focail idir lúibíní.

1. Tá an cumann sléibhteoireachta ag súil go \_\_\_\_\_ an aimsir go breá ag an deireadh seachtaine. (bí)
2. Ceapann *Fáilte Ireland* go \_\_\_\_\_ níos mó turasóirí ar cuairt go hÉirinn an bhliain seo chugainn. (tar)
3. Tá súil ag an múinteoir go \_\_\_\_\_ na daltaí go leor Gaeilge nuair a théann siad go dtí an Ghaeltacht. (foghlaim)
4. Deir na hiriseoirí go \_\_\_\_\_ an rialtas níos mó airgid do dhaoine ar phinsin an bhliain seo chugainn. (tabhair)
5. Is cinnte go \_\_\_\_\_ daoine a lán bia do laethanta saoire na Nollag. (ceannaigh)

**Ceist 5**

‘Táthar ag súil *comhréiteach* faoin scéim náisiúnta bealaí siúlóide a bheith déanta roimh an Nollaig.’

Tá go leor focal sa Ghaeilge a thosnaíonn leis an réimír ‘comh’. An féidir leat féin agus an duine in aice leat na colúin thíos a cheangal?

1	Is maith an rud é nuair a bhíonn..... idir na daltaí sa seomra ranga.	a	comhbhá
2	Toisc go raibh Seán an-bhocht nuair a bhí sé óg, bhí ..... aige le daoine bochta.	b	comhrialtas
3	Mura bhfaigheann páirtí polaitiúil amháin go leor vótaí, tagann dhá nó trí pháirtí le chéile chun ..... a chruthú.	c	comhtharlú
4	Ní raibh fhios ag Máire go raibh Sinéad ag dul ar saoire go Páras. .... a bhí ann nuair a bhuaill siad le chéile ag Túr Eiffel.	d	comhghleacaí
5	Sa láthair oibre, is maith an rud é bheith in ann dul i gcomhairle le ..... má bhíonn fadhb agat.	e	comhoibriú

**Ceist 6**

Pléigh na ceisteanna seo leis an duine in aice leat nó le do ghrúpa: An dtéann sibh ag siúl faoin tuath? An raibh deacracht agaibh riamh agus sibh ag siúl trí thalamh phríobháideach? Cad a cheapann sibh faoin socrú atá déanta ag Cumann na bhFeirmeoirí leis an rialtas?

## Treoracha agus Freagraí

### Ceist 1

Tá an plé seo le déanamh sula seinntear an tuairisc.

### Ceist 2

Is féidir iarraidh ar na mic léinn triail a bhaint as na focail ar dtús sula bhfeiceann siad an tuairisc agus ansin arís agus an tuairisc ar siúl.

1. úinéirí talún
2. lucht siúlóide (nó siúlóidithe)
3. comhréiteach
4. séasúr turasóireachta
5. ar tí socrú a dhéanamh
6. íocaíocht bhliantúil
7. bealaí siúlóide
8. caoi a choimeád orthu
9. cúpla caora
10. roinnt beithígh
11. pacáistí saoire
12. na figiúirí is déanaí

### Ceist 3

1. Tháinig os cionn ceathrú milliún turasóirí go hÉirinn i 2004 chun siúlóidí a dhéanamh agus do chaith siad 170 milliún euro.
2. Tá Cumann na bhFeirmeoirí ar tí socrú a dhéanamh leis an Roinn Gnóthaí Tuaithe chun íocaíocht bhliantúil a fháil do fheirmeoirí a chuireann bealaí siúlóide isteach agus a bhíonn sásta caoi a choimeád orthu.
3. Tá dearcadh dearfach ag Dónall Ó Loingsigh i leith lucht siúlóide, b'fhéidir toisc gur siúlóidí é féin. Insíonn sé dhá scéal faoi shiúlóidithe a chuir ainmhithe a bhí imithe ar strae ar ais isteach i bpáirceanna. Is dóigh leis go gcoimeádann siúlóidithe súil ar rudaí.
4. Socraíonn *Go Ireland Activity Holidays* pacáistí saoire do shiúlóidithe ó thíortha eile. Deir siad go ndéanfaidh an scéim bealaí siúlóide an-difríocht d'ainm na tíre seo thar lear.
5. Taispeánann na figiúirí is déanaí ó *Fáilte Ireland* gur tháinig 8 milliún turasóirí anseo i mbliana, méadú 8% ar an mbliain seo caite.
6. Tá lucht an tionscail sa deisceart ag súil go gcabhróidh an scéim nua bealaí siúlóide chun níos mó turasóirí ná riamh cheana a mhealladh go hÉirinn.

### Ceist 4

An chlaoninsint san aimsir fháistineach atá i gceist anseo.

1. go mbeidh
2. go dtiocfaidh
3. go bhfoghlaimeoidh
4. go dtabharfaidh
5. go gceannóidh

### Ceist 5

1e, 2a, 3b, 4c, 5d

### Ceist 6

Is féidir gach beirt a chur ag déanamh an phlé seo agus ansin cuid de na ceisteanna a phlé leis an rang iomlán.

## Eibhlín Ní Choistealbha

Tá Cumann na bhFeirmeoirí ar tí socrú a dhéanamh leis an Roinn Gnóthaí Pobail, Tuaithe agus Gaeltachta thar ceann úinéirí talún a ligfidh do lucht siúlóide dul thairis<sup>1</sup> a gcuid talún. Táthar ag súil comhréiteach faoi scéim náisiúnta bealaí siúlóide a bheith déanta roimis<sup>2</sup> an Nollaig, scéim a bheidh i bhfeidhm in am don séasúr turasóireachta 2007. Tá an scéal ar fad ag Grete O'Connor.

### Grete O'Connor

Tháinig os cionn ceathrú milliún turasóirí go hÉirinn i 2004 chun siúlóidí a dhéanamh agus do chaitheadar 170 milliún euro. Go dtí seo bhí fadhbanna anseo is ansiúd le húinéirí talún nach raibh sásta siúlóidithe a scaoileadh isteach. Ach an tseachtain seo, tá Cumann na bhFeirmeoirí ar tí socrú a dhéanamh leis an Roinn Gnóthaí Tuaithe chun íocaíocht bhliantúil a fháil do fheirmeoirí a chuireann bealaí siúlóide isteach agus a bhíonn sásta caoi a choimeád orthu. Is siúlóidí agus feirmeoir é Dónall Ó Loingsigh.

### Dónall Ó Loingsigh

Lá amháin bhíos ag siúl le grúpa ó Mhaigh Cromtha agus fuairamar cúpla caora a bhí sáite isteach i bpoll agus thóg na daoine a bhí ag siúl amach na caoirigh agus chuir siad isteach sa bpáirc iad. Lá eile bhí roinnt beithígh buailte amach ar an mbóthar<sup>3</sup> agus chuir na daoine a bhí ag siúl isteach sa bpáirc iad arís agus dhún siad an geata agus is féidir liom a rá go gcoimeádann na siúlóidithe aghaidh ar na rudaí mar sin.

### Grete O'Connor

Socraíonn *Go Ireland Activity Holidays* pacáistí saoire do shiúlóidithe ó thíortha eile. Deir siad go ndéanfaidh an scéim bealaí siúlóide an-difríocht do ainm na tíre seo thar lear. Ba chúis buartha i gcónaí é go dtí seo do chumainn a thagadh anseo nach n-éireodh leo cead d'fháil dul ag siúl ins na háiteanna ar mhaith leo.

Inniu foilsíodh na figiúirí is déanaí ó *Fáilte Ireland* a léiríonn gur tháinig 8 milliún turasóirí anseo i mbliana, méadú 8% ar an mbliain seo caite. Tá lucht an tionscail anseo ó dheas ag súil go gcabhróidh an scéim nua bealaí siúlóide chun níos mó turasóirí ná riamh cheana a mhealladh go dtí an tír seo.

Grete O'Connor, Nuacht TG4 i gCill Áirne

---

<sup>1</sup> thar a gcuid talún a deirtear sa Chaighdeán Oifigiúil

<sup>2</sup> roimh an Nollaig a deirtear sa Chaighdeán Oifigiúil

<sup>3</sup> ar an bóthar a deirtear sa mhír